



**ს ა ქ ა რ თ ვ ე ლ ო**  
**წყალტუბოს მუნიციპალიტეტის საკრებულო**



განკარგულება:გ-49. 49240894

თარიღი:29/03/2024

**არასამეწარმეო (არაკომერციული) იურიდიული პირის „წყალტუბოს მუნიციპალიტეტის დასუფთავების ცენტრის“ წესდების ახალი რედაქციით დამტკიცების შესახებ, წყალტუბოს მუნიციპალიტეტის მერისათვის თანხმობის მიცემის თაობაზე**

წყალტუბოს მუნიციპალიტეტის საკრებულომ განიხილა მუნიციპალიტეტის მერის (№48-482408751; 27/03/2024) წერილი, რომელშიც ითხოვს თანხმობას არასამეწარმეო (არაკომერციული) იურიდიული პირის „წყალტუბოს მუნიციპალიტეტის დასუფთავების ცენტრის“ წესდების ახალი რედაქციით დამტკიცების თაობაზე.

საქართველოს ორგანული კანონის „ადგილობრივი თვითმმართველობის კოდექსის“ 61-ე მუხლის მე-2 ნაწილისა და „წყალტუბოს მუნიციპალიტეტის მერიის დებულების დამტკიცების შესახებ“ წყალტუბოს მუნიციპალიტეტის საკრებულოს 2017 წლის 28 ნოემბრის №42 დადგენილებით დამტკიცებული წესდების მე-6 მუხლის მე-3 პუნქტის „დ.ბ“ ქვეპუნქტის შესაბამისად:

1. მიეცეს თანხმობა წყალტუბოს მუნიციპალიტეტის მერს არასამეწარმეო (არაკომერციული) იურიდიული პირის „წყალტუბოს მუნიციპალიტეტის დასუფთავების ცენტრის“ წესდების ახალი რედაქციით დამტკიცების თაობაზე (დანართი თან ერთვის).
2. განკარგულება ძალაში შევიდეს გამოქვეყნებისთანავე.
3. განკარგულება შეიძლება გასაჩივრდეს კანონმდებლობით დადგენილი წესით, მისი გაცნობიდან ერთი თვის ვადაში, ქუთაისის საქალაქო სასამართლოში (ქ. ქუთაისი, კუპრადის ქ. №11).

თეიმურაზი ჭეიშვილი

წყალტუბოს მუნიციპალიტეტის საკრებულო-საკრებულოს თავმჯდომარე

გამოყენებულია კვალიფიციური ელექტრონული ხელმოწერა/ ელექტრონული შტამპი



არასამეწარმეო (არაკომერციული) იურიდიული პირის „წყალტუბოს მუნიციპალიტეტის  
დასუფთავების ცენტრის“  
წესდება

**მუხლი 1. ზოგადი დებულებები**

1. არასამეწარმეო (არაკომერციული) იურიდიული პირი „წყალტუბოს მუნიციპალიტეტის დასუფთავების ცენტრი“ - (შემდგომში ცენტრი) წარმოადგენს საქართველოს ორგანული კანონის „ადგილობრივი თვითმმართველობის კოდექსისა“ და საქართველოს სამოქალაქო კოდექსის შესაბამისად შექმნილ არასამეწარმეო (არაკომერციულ) იურიდიულ პირს.
2. არასამეწარმეო (არაკომერციული) იურიდიული პირი „წყალტუბოს მუნიციპალიტეტის დასუფთავების ცენტრი“ დაფუძნებულია წყალტუბოს მუნიციპალიტეტის მიერ. არასამეწარმეო (არაკომერციული) იურიდიული პირის სახელწოდებაა ა(ა)იპ „დასუფთავების ცენტრი“.
3. ა(ა)იპ „დასუფთავების ცენტრი“ თავის საქმიანობას წარმართავს საქართველოს კონსტიტუციის, საქართველოს კანონმდებლობითა და ამ წესდების შესაბამისად.
4. წინამდებარე წესდება წარმოადგენს ორგანიზაციის დამფუძნებელთა შორის დადებული სადამფუძნებლო შეთანხმების ნაწილს, რომელიც გამოხატავს მათ ურთიერთთანხმებულ ნებას და სავალდებულო ძალის მქონეა დამფუძნებლებისათვის.
5. ცენტრის მიზანია არასამეწარმეო (არაკომერციული) საქმიანობა, ამავდროულად ის უფლებამოსილია ეწეოდეს დამხმარე ხასიათის სამეწარმეო საქმიანობას, რომლიდან მიღებული მოგებაც უნდა მოხმარდეს მისი მიზნების რეალიზებას. ასეთი საქმიანობის შედეგად მიღებული მოგების განაწილება ორგანიზაციის დამფუძნებლებს, შემომწირველებს, აგრეთვე ხელმძღვანელობასა და წარმომადგენლობაზე უფლებამოსილ პირებს შორის დაუშვებელია. ცენტრი უფლებამოსილია მისი საქმიანობის განსახორციელებლად შეიძინოს/მიიღოს მატერიალური და არამატერიალური ქონება, მათ შორის შემოწირულობები.
6. ცენტრს, თავისი მიზნების მისაღწევად, უფლება აქვს განახორციელოს კანონით აუკრძალავი ნებისმიერი საქმიანობა, მიუხედავად იმისა, არის თუ არა ეს საქმიანობა წინამდებარე წესდებით გათვალისწინებული.
7. არასამეწარმეო (არაკომერციული) იურიდიული პირი „წყალტუბოს მუნიციპალიტეტის დასუფთავების ცენტრს“ აქვს დამოუკიდებელი ბალანსი, მრგვალი ბეჭედი, საანგარიშსწორებო და სხვა ანგარიშები საბანკო დაწესებულებებში და არასამეწარმეო (არაკომერციული) იურიდიული პირის სხვა რეკვიზიტები.
8. ა(ა)იპ „წყალტუბოს მუნიციპალიტეტის დასუფთავების ცენტრი“ საკუთარი სახელით ახორციელებს თავის უფლებებსა და მოვალეობებს, ამყარებს კონტაქტებს ფიზიკურ და იურიდიულ პირებთან. დებს გარიგებებს და შეუძლია გამოვიდეს სასამართლოში მოსარჩელედ და მოპასუხედ.

9. არასამეწარმეო (არაკომერციული) იურიდიული პირის „წყალტუბოს მუნიციპალიტეტის დასუფთავების ცენტრის“ იურიდიული მისამართია: ქ. წყალტუბო ყაზბეგის ქუჩა N 2 ა. ელექტრონული ფოსტა [wyal tubodasuftaveba@gmail.com](mailto:wyal tubodasuftaveba@gmail.com)

## **მუხლი 2. „წყალტუბოს მუნიციპალიტეტის დასუფთავების ცენტრის“ მიზნები და ამოცანები**

„წყალტუბოს მუნიციპალიტეტის დასუფთავების ცენტრის“ მიზნები და ამოცანებია:

- ა) მუნიციპალიტეტის ტერიტორიაზე ქუჩების, მოედნების, სკვერების, პარკების, საზოგადოებრივი საპირფარეშოებისა და საზოგადოებრივი თავშეყრის ადგილების დაგვა - დასუფთავება;
- ბ) ნებისმიერი ტრანსპორტირებადი ნივთის, მყარი საყოფაცხოვრებო ნარჩენებისა და დაგვა - დასუფთავების შედეგად მოგროვილი მასის შეგროვება - გატანა განთავსების ადგილზე;
- გ) მუნიციპალიტეტის ტერიტორიაზე ნაგვის ბუნკერების განთავსება და მათი დეზინფექცია შესაბამისი წესების დაცვით.
- დ) ნაგვის ურნების/კონტეინერების მოვლა-პატრონობა, რესტავრაცია-შეკეთება;
- ე) საქართველოს კანონმდებლობით, ამ წესდებით და წყალტუბოს მუნიციპალიტეტის ადმინისტრაციულ-სამართლებრივი აქტებით დადგენილი სხვა ფუნქციების შესრულება.

## **მუხლი 3. ცენტრის სტრუქტურა**

ცენტრის სტრუქტურა შედგება ცენტრის დირექტორის, ადმინისტრაციისაგან, დასუფთავებისა და ნარჩენების შეგროვების მართვის, ცენტრალური პარკის ზედამხედველობის სერვისებისაგან.

## **მუხლი 4. ცენტრის მართვა და ხელმძღვანელობა**

1. ცენტრის საქმიანობას წარმართავს დირექტორი.
2. დირექტორის თანამდებობაზე შეიძლება დაინიშნოს პირი, რომელსაც აქვს უმაღლესი განათლება. დირექტორს ნიშნავს და თანამდებობიდან ათავისუფლებს წყალტუბოს მუნიციპალიტეტის მერი.
3. დირექტორი ვალდებულია მისი არყოფნის პერიოდში აცნობოს წყალტუბოს მუნიციპალიტეტის მერს დირექტორის მოვალეობის შემსრულებლის შესახებ.

## **მუხლი 5. „ცენტრის“ დირექტორი**

1. წარმართავს და ორგანიზებას უწევს „წყალტუბოს მუნიციპალიტეტის დასუფთავების ცენტრის“ საერთო საქმიანობას;

2. პასუხისმგებელი საქმიანობის კანონიერებასა და ეფექტურობაზე;

3. კანონმდებლობის შესაბამისად განაგებს ცენტრის ფინანსურ და მატერიალურ საშუალებებს, ეკისრება პერსონალური პასუხისმგებლობა ცენტრის სარგებლობაში არსებულ ქონებაზე და ფულადი სახსრების მიზნობრივად და სწორად ხარჯვაზე, კომპეტენციის ფარგლებში დებს გარიგებებს და აფორმებს ხელშეკრულებებს, როგორც საქართველოს, ასევე სხვა ქვეყნების ფიზიკურ და იურიდიულ პირებთან;

4. საქართველოს შრომის კოდექსის თანახმად, თანამდებობაზე ნიშნავს და ათავისუფლებს ცენტრის თანამშრომლებს, დებს შრომით ხელშეკრულებებს, კანონის ფარგლებში თანამშრომელთა მიმართ იღებს დისციპლინარულ და წახალისების ზომებს;

5. უფლებამოსილების განსახორციელებლად გამოსცემს ბრძანებას, რომელიც მოქმედებს ცენტრის ფარგლებში;

6. წყალტუბოს მუნიციპალიტეტის მერს დასამტკიცებლად და/ან ცვლილების განსახორციელებლად წარუდგენს სამტატო ნუსხას, სახელფასო განაკვეთს და ხარჯთაღრიცხვას;

7. წესდებით გათვალისწინებული მიზნებისა და ამოცანების მისაღწევად უფლებამოსილია განახორციელოს ნებისმიერი საქმიანობა, რომელიც არ ეწინააღმდეგება მოქმედ კანონმდებლობას;

8. ანგარიშვალდებულია წყალტუბოს მუნიციპალიტეტის მერის წინაშე, ცენტრის სტრუქტურული ერთეულების ხელმძღვანელები და თანამშრომლები ანგარიშვალდებულნი არიან ცენტრის მმართველის წინაშე;

9. პროფესიული დონის ამბლებს მიზნით შეიმუშავებს და ამტკიცებს პროგრამებს, ახორციელებს ღონისძიებებს.

## **მუხლი 6. მატერიალური ბაზა და ფინანსები**

1. დასახული მიზნებისა და დაკისრებული ფუნქციების განსახორციელებლად ცენტრს გადაეცემა შესაბამისი ქონება, საქართველოს კანონმდებლობით დადგენილი წესით;

2. ცენტრის დაფინანსების წყაროებია:

ა) წყალტუბოს მუნიციპალიტეტის ბიუჯეტის გამოყოფილი მიზნობრივი სახსრები;

ბ) საქართველოს კანონმდებლობით ნებადართული სხვა შემოსავლები;

გ) ამ მუხლით განსაზღვრული სახსრები კანონმდებლობის შესაბამისად ხმარდება მხოლოდ „წყალტუბოს მუნიციპალიტეტის დასუფთავების ცენტრის“ მიზნებისა და ფუნქციების განხორციელებას, ცენტრის სახსრების სხვა მიზნით გამოყენება დაუშვებელია;

3. ცენტრი ვალდებულია კანონმდებლობით დადგენილი წესით აწარმოოს საფინანსო - ეკონომიკური საქმიანობის აღრიცხვა - ანგარიშგება კანონმდებლობით დადგენილი წესით.

## **მუხლი 7. საქმიანობა, რომელიც საჭიროებს თანხმობას**

„წყალტუბოს მუნიციპალიტეტის დასუფთავების ცენტრს“ შეუძლია მხოლოდ წყალტუბოს მუნიციპალიტეტის მერის და საჭიროების შემთხვევაში სხვა შესაბამისი ორგანოების თანხმობით, განახორციელოს შემდეგი ქმედებები:

ა) უძრავი ქონების შეძენა-დატვირთვა;

ბ) სესხის აღება;

გ) თავდებობა;

დ) საშტატო განრიგისა და ხელფასის ფონდის განსაზღვრა;

ე) სხვა გადაწყვეტილებები „წყალტუბოს მუნიციპალიტეტის დასუფთავების ცენტრს“ ქონებასთან დაკავშირებით, რომლებიც სცილდება ჩვეულებრივი საქმიანობის ფარგლებს.

### **მუხლი 8. საქმიანობის კონტროლი**

1. „ცენტრი“-ს საქმიანობა ექვემდებარება კანონმდებლობით დადგენილ კონტროლს.
2. „ცენტრი“-ს საქმიანობის კონტროლი გულისხმობს, „ცენტრი“-ს მიერ განხორციელებული საქმიანობის კანონიერების, მიზანშეწონილობის, ეფექტიანობისა და საფინანსო-ეკონომიკური საქმიანობის ზედამხედველობას.
3. მუნიციპალიტეტის მერია უფლებამოსილია განახორციელოს კონტროლი „ცენტრი“-ს საქმიანობაზე, კონტროლის განხორციელების მიზნით საჭიროების შემთხვევაში მოითხოვოს შესაბამისი მასალები და ინფორმაცია.

### **მუხლი 9. წესდებაში ცვლილებების და დამატებების შეტანის, რეორგანიზაციისა და ლიკვიდაციის წესი**

„წყალტუბოს მუნიციპალიტეტის დასუფთავების ცენტრის“ წესდებაში ცვლილებების და დამატებების შეტანა, რეორგანიზაცია და ლიკვიდაცია ხორციელდება წყალტუბოს მუნიციპალიტეტის მერის მიერ, საქართველოს კანონმდებლობით დადგენილი წესით

### **მუხლი 10. დასკვნითი დებულებები**

1. წინამდებარე წესდება ძალაში შედის წყალტუბოს მუნიციპალიტეტის მერის მიერ წესდების დამტკიცების შესახებ მერის ბრძანების ამოქმედებიდან;
2. თუ ამ წესდების (დამფუძნებლის შეთანხმების) რომელიმე დებულება ბათილად იქნა ცნობილი, ეს გავლენას არ მოახდენს წესდების სხვა დებულებების ნამდვილობაზე;
3. ამ წესდებისა და საქართველოს მოქმედ კანონმდებლობას შორის არსებული შეუსაბამობის შემთხვევაში მოქმედებს კანონი.